



մաս-մաս փոխադրում է վար, գյուղը, մինչդեռ ադրբեջանցին մեծ մասամբ ամբողջ պաշարը թողնում՝ պահում է իր մոտ սարում՝ գյուղում կամ ձմեռանոցում շատ քիչ մարդ, երբեմն ոչ մեկ մարդ թողած լինելով: Ադրբեջանցին իր ավելցուկը ծախում է կամ տեղում, նրան այցելող միջնորդներին, կամ իջեցնելով մերձավոր շուկաները: Միջին կարողություն ունեցող ադրբեջանցու վրանը լինում է և ավելի ընդարձակ, և ավելի սարքավորված գորգերով և փալասներով, քան թե միջին կարողություն ունեցող հայինը, սակայն երկու հարևան ազգությունների վրանակազմության ձևերի մեջ էական տարբերություններ չեն նկատվում: Թե՛ ադրբեջանցին և թե՛ հայը խոտից մաքրելով և հարթեցնելով իր ընտրած հրապարակը և շուրջը անձրևաջուրը հեռացնելու համար թեթևակի փորելով, ցցում է գետնի մեջ իրար դիմաց երպուտնէր՝ ձողեր և գլուխները կոացնելով և իրար բերելով կապում. ստացվում են աղեկամարներ: Մինչդեռ Լոռում այդ ձողերը դասավորվում են գրեթե շուրջանակի և բոլորի գլուխները միացվում են կենտրոնում, որտեղ տակից դրվում է նեցուկ-սյուն, Զանգեզուրում ալաշուխի՝ վրանի կմախքը հյուսվում է անսյուն գուգահեռ աղեղներով: Նախ և առաջ ցցվում են զուգահեռ աղեղներ աջից ձախ ուղղությամբ, ապա նրանց վրայից գալիս են աղեղներն առջևից դեպի ետ և հատելով մյուսներին ուղիղ անկյան տակ գոյացնում են թաղակապ տարածություն: Եթե աղեղների ոտներն արձակելու լինենք և ամբողջ հյուսվածքը տափակացնելով գետնին պարզենք՝ կստացվի քառանկյունի աչքերով մի ցանց (գծ. 1):

Եթե նույն ձևով վարվելու լինենք Լոռվա վրանի հետ, կստացվի ձողերի ճառագայթաձև դասավորություն՝ հետզհետե լայնացող համակենտրոն շրջաններով իրար հետ շաղկապված (գծ. 2):



Գծ. 1.



Գծ. 2.

Զանգեզուրի ձևը թույլ է տալիս ազատորեն ընդարձակել ներսի տարածությունը աջից ձախ, կորացած աղեղների թիվը և դեպի առաջ կամ դեպի ետ ավելացնելով և այդ եղանակով վրանը երկարացնել, պահպանելով նրա լայնությունը: Առաջ է գալիս թաղակապ տարածություն: Ձողերը խաչաձևման անկյունները պարանով կամ մի այլ ձևով կապվում են, որպեսզի չշարժվեն քամուց և այդ ձողերի կմախքի շուրջը պատում են եղեգից կամ ուռենու բարակ ճյուղերից կապած երկար ու նեղ — մոտ 70—90 սմ լայնությամբ խսիրով՝ չաքնավ³⁰, այն հաշվով, որ առջևից մուտքի համար մնում է տարածություն,

³⁰ Հյուսողները մեծ մասամբ ադրբեջանցիներ են: